

四庫全書

集部

欽定四庫全書

本堂集卷七

宋 陳著 撰

五言律詩

到倪庵

聯袂西庵去行清不厭深
蘭芳泛幽谷松翠引長林
石路傍山麓澗源何處尋
歸途無所有時聽一猿吟

入城似吳竹溪

投眠方丈室為趁午潮差父執子愛我客身心是家夜
牀安紙帳曉枕夢梅花早作臨溪別此情天共涯

過崎山

曉過崎山下溪清水見沙石根交虎豹樹影亂龍蛇黃
竹藏舟渚青帘賣酒家扣舷汀鷺起撇撇帶西斜

江口偶成

出門何所適欲見邵雲臺天氣晴相送灘舟小易推坐
恬時掬水吟苦恰嘗梅舟子遙相問江潮來未來

西渡堰呈孫古巖朝奉

行計又怱怱投西一短篷上河平岸水暮雨打頭風得
飯已昏後無眠到夜中哦詩欠佳句為報古巖翁

泊丈亭

丈亭亭下浦艤棹又終朝船聚市聲雜風生江氣驕
行未百里已涉第三潮去住向誰問鷺飛雲影飄

同袁通判

名璟

遊越中三首

舟行可十里上岸即山林曲徑抱深意怪松傳古音平

生能幾到好處欲窮尋春鳥一聲處鄉關又上心

右禹廟

停舟過橋去兩岸綠垂楊遮屋水為界入門花滿廊如今為道院聞昔是書堂此意與誰說春風湖渺茫

右鴻禧觀

前賢眼力到占得此名區荒徑百年樹虛堂三面湖簷陰來釣艇花外起晴鳬借問園中叟主人曾到無

右趙節使稽山門外花園

示內

婚娶不在早在此兩相宜豈得人無婦能如子者誰科
名圖我取家務以身支要見看承處頽然白髮時

呈月窓兄

頗有愛山心山人交未深不知迴俗駕依舊入儒林樂
處外何有故書中可尋漁蓑歸得晚風雨伴吾吟

張敬之縣尉

名欽

仙棹發秋灣溪山到不難要將培遠業便答自初官秦

望一峯峭賀湖千頃寬用心行已處時向此中看

公棠溪次待舅氏竺九成偶成

駐馬古溪頭期舟不見舟未知來否的難決坐行謀灘
遠寬飛鷺波平穩泛鷗功名在何處到此兩悠悠

晴行

久晴常欲厭默裏却宜晴溪瘠容魚穴風恬安雁程空
山巖出相老樹葉生聲此景吟不盡明朝重細評

杳溪巖頭

晴色上遊筇西行二里中
薺花黃繡地麥穗白潮風紙
杵鳴山屋齋鐘出梵宮歸
途須傍早要折石巖紅

遊永固院

晴行不自覺又入此山來
失笑谷聲應坐迎僧戶開
簷風數行竹窻入一枝梅
歸策休催發得閒能幾回

遊慈雲

微吟歡信步不覺到禪關
植杖苔痕上敲門竹影間
樹高風韻葉人靜鳥呼山
安得長留此分僧一半閒

秋晚新晴

杖屨訪郊晴秋光潑眼明溪痕經水沒山面撥雲程霞
影收虹影砧聲急雁聲芙蓉花在否滑路倩人行

夜秋偶成

山築塵囂外清標夜氣中荻花渾妬月梧葉已嫌風釣
箔驚簷馬冊燈覓候蟲困來還倚竹此意有誰同

次前韻與舅氏竺九成求芋

何處蹲鴟美雲南一望中角巾臨晚歲拙語寄西風喜

報無乾鵲絨回靳篆蟲還詩元有例盍與昔人同

次韻徐直翁

名清

僊霞嶺近衢州

道大誰能用功名一念微釋然文石夢輕似岫雲歸霞
嶺空重歷天書的又飛翻身鳳池去分閫却成非

次韻童尚質書懷三首

夜室清如許檠燈便且明哦詩鬚已斷看劍氣難平露
戶浸孤月江城知幾更枕書俄作夢夢覺骨毛輕

地偏人跡悄月到小窓明鼓瑟希曾點觀書慨屈平物

情閒裏見世事夢中更不着黃梁枕虛名已自輕
夜寂氣如洗心閒理自明凝香清夢寐讀易悟生平
月樹烏驚曉雲堦鶴報更閉門佳致意名利一毛輕

寄貝勉齋馮桂坡

道誼不今古世情空淺深共君聯夜話慰我一生心對
酒青燈影分襟細雨陰天南豈無雁時得寄書音

嘉興道中

此來知幾番此景孰能言有堰流河水無山礙稻村船

收菱入市家植桂當門風物有如此誰招二陸魂

六里橋泊

拒霜紅蓼鼓兩岸遮迎逢風雨日易夜江湖秋似冬縱
觀心浩蕩無事夢從容不問程途遠詩情節節濃

四安縣道中望一山最尖青問轎夫云是饅頭山
因有詩

眼前山忽好它處特紛紛四下正鋪墊一尖高入雲乾
坤分外濶江浙此間分我欲更村號尊為卓秀君

到四安

雨中行數日今日得新晴山到浙間秀船從海上行市
腥逢海錯人語帶京聲此處搃佳景披仙曾細評

長兒吉初生日以四十字示之

吾年五十五汝生方九年雖知得子晚亦擬壽家傳立
已要莊重存心無疎偏人皆可向上從不勿歸天

康節云我

顧願汝為大賢未知天意肯從否蓋
康節喜言數故為此說非至論也

嵯縣勸農途中示同寮二首

連朝風或雨今日却霜晴簇翠麥苗起繡斑麻甲生雞
村炊色較牛籠種痕平此意與誰共老農歡笑聲
老農歡笑聲三十里春程笳鼓斷還續盃盤坐又行誰
云償縣債正好看民情歸去不妨晚出山溪月明

剡中明心寺

塵勞一笑非忽此坐多時當谷寺如井滿山泉可池林
暄蟬噪早沙冷筍生遲又見老僧說此中蘭最奇

剡縣次韻石瑤林帥幹春宴

歲君初領事豹尾簇黃旂雪喜三番白春纔幾日班市
盤裝菜活宮勝壓花繁便覺東風轉四山浮翠環

解剎回家過陳公嶺

漫仕當閒遊歸程更自留嶺高雲送脚峯險石垂頭家
近聽鄉語山分認水流溪橋聊小憩雙鷺去悠悠

山家即事

小築山之下林泉景自成閒花隨付分啼鳥本無情日
暮嶺雲合雨餘溪水清相逢是樵客堪與話平生

山居避難六首

三十六風輪消磨萬古人
軍興山勝市歲歉富齊貧
破絮身饒垢乾糧舌費津
吾生不足問世事入長顛

并刀越砥磨天奈北風何
到處聞流杵何時報止戈
逃藏愁木柵淪落泣毬窩
多少巖阿關真成病伏波

宦遊二十載時異即東還
勇棄斗升給本無分寸攀
家貧空婦巧學廢重時頑
平世已無況況巢松竹關

患難合扶攜臨危路各迷
傳聞妻奔北邂逅子隨西
心

悼驚雷燕身寒立雨雞明朝問家事空壁雪風淒
避地託山翁歸心亦欲東西村明騎火止渡撼兵風抖
擻塵衣黑摩挲淚眼紅何如且深隱苟活老光鴻
人生有如夢世變亦浮漚無有悟雙遣窮通歸四休終
期風日美不見雪霜愁此意因相諗聊寬無益憂

本堂集卷七

欽定四庫全書

本堂集卷八

宋 陳著 撰

五言律詩

倪峯避難

衰年踏險行五賊太無情
落葉滑霜路空山生夜聲
相攜德耀隱幾喪卜商明
歸計未為是時時心自驚

山家即事

逃難走山巔如何要順便食艱蔬勝肉衣薄炭輸綿深
靜初心見高虛遠目鮮沉思亦自好寫景欠龍眠

雨後雪

深山雨易雪片大不成花翁媪熱摩面兒童寒戰牙如
居峨頂寺休問洛陽家宜麥今雖兆明年事未涯

雪復晴

冬來多是雨日日望雲回飄灑不成雪連綿如入梅高
風吹日上短景為山催那問歸家事牀頭有宿醅

似范景山

字曉村
名澗

我輩豈池蛟飛騰此一交
天門驚路梗水港笑舟膠
甚新薇蕨依然故草茅從
今門外事洗耳學由巢

還家得驚報復回避所

北馬又經山傳聞頃刻間
山將身坐斷家有夢飛還
吞哭自憐甫忍饑誰念顏
真成傷箭鳥翼翼怕虛彎

夜宿倪庵坐雨二首

一自入庵來翛然百念灰
松風晴後雨澗水靜中雷
鄰

戶新蠶母樵夫挾雉媒若夫山外事何必過天台

連朝雲藹藹一夜雨颼颼漲霧黑天曉洗山黃澗流澗
深麻長骨濕重麥垂頭春水可農事只愁兵未休

杜工部詩有送弟觀歸藍田迎新婦二首偶與縣尉弟達觀同名娶事又同因韻戲示

墨龜初卜食青鳥好音回冰玉皆前契風波任外來重
因藍袖舞輕放赤城開此事關宗事終須飲醺杯

扇手笑終在琴心曲暗留相期星戶夕莫負月娥秋金

瀨遲揚旆藍橋趣問舟定將先入夢駢鳳遶簫樓

次韻張子華見寄

老矣息林丘平生不徑由知心時一見安分別無求寒
卧死中活榮華樂處憂世間何限事曾看過雲不

三月晦日同弟觀侄津往寶幢哭刑部伯求弟道
從茅山泊東林寺弟觀有詩三首因次韻

投憩得幽寺便忘行路遥竹邊流水過門外好山朝金
相已流土海音無復潮池簷立良久老衲忽相邀

右東林寺

劫火不飛去便如仙洞源載袂交野艇賣筍到僧門潮
水河分港南風雨暗村家山百里外回首已黃昏

右寺前即事

山泉今已矣開落夢中花欲哭青松墓却留黃檗家眼
花飛作練心事苦如荼造物故相阻雨陰殊未涯

右坐雨

次韻延慶僧惟巧山見贈

巧山元不巧此處不容傳意到頭撞壁吟香口有蓮江
心皆逆旅風月獨知賢世事如何說相看一笑邊

次韻西山寺主僧清月

高占古松間塵埃笑却還禪機叅翠竹詩價重青山長
與雲分榻時從鶴出關誰云寺門小窮處是清閒

俞蓀墅

名雷字叔可

示以雜興四首乃用危驪塘所次

唐子西韻因次韻

小小山前屋深深竹裏門閒關諸世夢寬綽養天根趣

涉詩書圖名歸耕釣村日長無一事笑語子孫繁

羨君培早學人十已千之燕雀誰知我蛟龍自有時文章魁衆後計幕主相知天地如長泰功名何可涯

乾坤今似許炊禍自非材危活茅頭米驚愁笛裏梅世方淫佛老誰肯問參回太息復太息吾徒何以哉

人生無足處知足是良方自種蓀成墅時同雲出鄉江湖殘夢香山谷本心長回首門前事風潮戰石塘

平平聊送目咄咄不書空靜見蝸爭國窮知馬福翁逢

人無眼白耐是得顏紅如此閒光景何須到弱蓬

學得無名氏遊于何有鄉熟眠勝醉酒清慮當焚香富有書連架貧無盜伏梁只應詩社友時節到門牆

世運空更嬾人生任覆翻浮榮歸墮甌真味計污尊見客不問事學農時踏村興公舊遊處長笑一招魂

我才雖不武縱靶洛陽橋本是士行志非因貧折腰天風吹劫火國事付回潮待盡山深處汗顏猿鶴邀

道路塵方暗田園事宜差營巢難老鶴謀啄拙飢鴉時

有詩題壁多因病在家學仙非骨相枉是住丹霞
詩卷勞相寄吟高欲和難澹情如水接秀句共霞餐
妄奏蛙聲樂叨盟馬血盤豈能無牴觸一笑幸吾寬

次韻史芝厓

名質孫

浮生真夢幻看破已頻頻花柳春心古乾坤世事新
爭芳多煖處感舊獨幽人寶重復珍重清風明月身

次韻石秀叔

名大震

揮手世間塵忘言晉與秦溪山能住客風雨始知人淡

淡秋光趣悠悠野鶴身相聞願相見倦腳走雙輪

次韻齡叟見寄

方外好交情詩筒出醉屏清能濯驕暑光欲掩長星自
愧薄榆景有生真草亭多年祇多感岌岌舊門庭

戴帥初九日無憀以滿城風雨近重陽為韻七首
袖而示余因次其韻

畏景日以長正氣日以短過者何憧憧寂寂笑衰懶浮
雲有聚散明月有虛滿人事有如斯冷緒聊自纂

爾來三五年處處罹過兵誰能宴龍山無復遊彭城今
茲九日至正爾百感生仰天破帽落失笑還自驚

年年好時節雪月花與風誰知百年內憂樂元不同方
其少壯日日日醉夢中中年旋衰颯有景誰復窮

吾髮白且老面目又塵土流落如秋娘無復畫眉嫵徒
懷萬里心夜夢良勞苦欲言言向誰鷄鳴正風雨

履險須頓足逢躁須戒吻況今為何時正恐無他隱柴
門倘可閉即與桃源近豈無耆舊在努力各自謹

世多多才翁誰識識字農可人忽來思勞苦意稠重時
危幸未死尊酒得相從一醉不須辭毋待漏盡鐘
平生朋友樂魚泳雁飛翔如今不復昔往往深退藏安
得無言心相照松栢霜飲此九日酒味哉剥果陽

崇福寺大用堂乃魏文節祠舊有半牀雲一窻月
在兩挾取舒懶堂詩中語也主僧澤南洲撤兩
挾尊大用堂而新之魏東齋有詩因次韻

魯公香火寺便道幾經行樹老存高節碑存見太平浮

雲從變化古月自分明賴有文孫在毋忘大用名

謝趙菊泉來會于范曉村家

虎林唐姥嶺牛渚范公亭不是義高古誰能行戴星開
尊春酒赤對榻夜燈青說到間關處令人心有銘

用前韻呈曉村

溪山兩相望只隔五長亭一見坐聯日高談氣拂星好
賓知絡秀兼僕困樵青此會受多益歸途杖可銘

雨中留范曉村家

年來常閉戶一動自知非坐雨詩消悶思家夢當歸山
林容自拙道路目孤飛便整回頭步西園筍薹肥

到永固寺訪曹約齋

名說

本是塵埃客夤緣到上方茶嘗新雨味酒吸綠陰香半
日清風古百年佳話長悠悠一俛仰我欲憩斜陽

用前韻送酒與約齋

人生以類合圓本不投方家話太平舊山盟晚節香百
罹心易足一醉味何長但得靜中樂村村皆洛陽

到淨慈展墓次韻吳棟憲

名應奎
字文可

有客肯尋僧新吟清剡藤交情自秋月浮世看春冰猶
顧慈雲榻相期元夜燈我來當赴約樓上看陳登

再用前韻謝吳竹脩

名峻字
山甫

禿髡歸陽羨僊髯臥古藤前賢成昨夢後輩嗣誰燈傾
蓋欣如故吟壇得共登春風吹相聚聊此寄韋冰

本堂集卷八

欽定四庫全書

集部

本堂集卷

九至
十五

詳校官庶吉士_臣李傅熊

主事_臣呂雲棟覆勘

總校官進士_臣

朱鈐

校對官主事_臣

陳墉

謄錄監生_臣

吳貽棟

欽定四庫全書

本堂集卷九

宋 陳著 撰

五言律詩

答吳棣憲

來訪在家僧
連牀坐夜燈
狂談拋玉麈
劇飲渴黃藤
一見皆風月
相投不炭冰
何當長作伴
山水足臨登

與齡叟

幾年西崦寺門鮮路交藤龍象開禪席鐘魚張法燈領
徒耕趁雨對客句裁冰我亦相忘者慈雲得屢登

醉書永固方丈示東隱

西麓與東風前緣得二翁雅心千古上慈汁一尊同猛
省塵埃夢飽參松竹風綺黃在何處我欲問冥鴻

用前韻答齡叟見寄

草堂存老我茅屋著而翁門戶兩家異溪山一趣同夜
爐楮火春閣杏花風何惜盟吟社浮塵付過鴻

如心姪名演有詩因用韻

越鳥不巢北流水東不西人心胡不常隨世為昂低造
物善戲人如兒笑或啼行止當自適何用爾栖栖

題晚照樓

乳峯天下景清景此尤多簷影斜陽樹簾香新水荷虛
通雲入室平送鶴歸窠高坐清涼境人間自沸鍋

呈雪竇僧野翁

名善來

雨屋又留連回頭七載前同遊半黃土百感兩霜巔睡

醒茶為崇吟清山結緣他年北憲下誰復對牀眠

丹山主者恭雪航年七十餘清苦善吟八句以似
本是佳林深浮雲載出林蹒跚多病脚邂逅十年心破
鼓饑甘飯殘燈老醒吟我來相訪外梅竹是知音

丹山酒邊

衰老愛晴光相攜到上方意濃忘酒薄話美奪塵忙天
竺靜逾媚溪梅初有香危時正多事半日太平鄉

次第觀二首呈雪航

流俗方瀾倒禪心自鐵頑人于詩信老天與病全閒拄
杖溪山曲移尊雪月間相逢多拙句為我細脩刪

再呈雪航

如今事如許我得強癡頑避世貧為福信天忙亦閒乾
坤孤注外風月兩顰間賸有遊山記從他野筆刪

遊慈雲二首

今夕是何夕相攜踏雪乾弟兄清濁酒僧俗素葷盤
邂逅半年事笑談終日歡欲歸歸未得戀月靠闌干

有分醉慈雲相留氣味真樞香千丈雪筍雋萬年春此
會不多見如今能幾人胡為弗回首三笑亦風塵

與單君範坐凝光亭

危世見交情相逢坐小亭平看二麥秀虛受萬山青往
事酒俱醉可人詩自醒悠悠一俛仰白鳥入冥冥

次韻趙菊泉

世衰人物渺猶見得閒平劫火詩書脈春風杖履盟霏
霏玉屑話淡淡菜羹情相對青燈下平生心事明

次韻黃長儒

名正孫

別陳子得

名萊

兩間何納納長夜正漫漫感舊心猶熱逢春眼自寒人
情伐木宋世變幻花韓寂寞衡茅下從他作拙看

題東堂竹

種來三世遠一片綠猗猗節直清逾見心虛高不知寧
求千畝富足與七賢期要得龍孫茂封培無已時

次韻弟觀田蠶即事

詩禮雖傳世農桑不離門梅天綠雪屋秧雨種雲村衣

帛知先老舍飴擬弄孫願言同井樂無怨亦無恩

長孺以新生求名命曰相兒

有女諧良偶承宗在嫡兒館甥纔匝歲宅相果如期脈
發慈溪正胞成江夏奇咳名應會得乳口見嘔呶

次韻竺梅潭

名自中

老境

浮生年復年安處即神仙子壯閒專日家和笑答天軟
炊脂白米甜釀雪清泉蔗境有餘味吟情直造玄

喜見單君範

世哀交道薄相好獨金蘭
見面驚雙瘦知心話百難
老餐葱本煖清坐杏花寒
明日休輕別流年水赴灘

靈濟庵主僧泉蒙山招飲偶成

水面巧安排軒窓爽豁哉
橋關江氣定門約市聲開
遠景天相送清風客自來
夜牀涼睡足有夢到蓬萊

留范景山家聞夜警有作

燈窓坐無寐吾亦自憐吾
活在虎狼窟老猶風雨途
世情多短氣心事一長吁
幸有秋成好仍聞夜警呼

雨留景山家

桂後菊花前相逢夢覺然閒心時外話親意雨中眠投
老會難必臨行留更堅西風亦解事未肯放晴天

晴歸

兒造弄晴曦安排老我歸江收閒水退山戴斷雲飛晚
色明官路清寒攪客衣行行到嵩曲猶可及斜暉

范公亭歸途

客窓連日雨晨發趁晴光禿鬢去秋老倦心愁路長終

須山坐靜有感水流忙更有難言處乾坤事渺茫

白珽寄詩次韻見意

江千風雨別君住我初回兩地夢相覓十年書一來字
叅老米到詩放晚唐開直要吟成史掃除塵世埃

用梅山別諸賢韻

世變事難必天倫愛自深醉醒皆外物甘苦共初心倦
翼山招返寒林風為吟何當長聚首裒境況相尋

齡叟醉我以鼓笛之筵八句見意

樓閣倚晴天。知心得老禪。風光百年事。民命數家烟。燈火猶嬉鼓。山林有醉筵。殘生聊爾耳。休話到兵前。

次韻吳竹脩發慈雲

入山知幾約。手墨未曾乾。危世一遊重。清交百念寒。吟成佳句易。說到太平難。終夜飲不醉。何從得睡軒。

靈濟庵會高麗僧全息庵八句遺之

生從箕子國。來拜觀音山。迢迢萬里外。了了一見間。風波任浩蕩。雲月自往還。莫怪三笑圖。我非元亮班。

書於靈濟方丈

信步領兒行又來天盡堂
老衰憑酒健春好得詩香
花柳年年事江山處處鄉
拍欄一相笑白鳥入微茫

酒邊呈鄭耐軒

名邦采丞相
清之孫也

行行曲曲廊迤邐入書房
多客坐甌煖百花吟几香
人間正桃李屋角自蔬桑
信是閒中好相忘古話長

靈溪房

名可
偶成

隨雲入寶坊寄憩正師房
醉枕老易醒閒窓春亦忙
暄

風浮淑氣好客帶詩香信美難久住我家山水鄉

翌日風雨再用韻

初心驤伏坊活計蟻營房家與水風近春方風雨忙僧
窓熟處穩兒信狎來香去住底須閒悠悠何有鄉

遲留又用韻

畱宿不覺久非因戀竹房山林遲老死萍梗急貧忙走
俗形幾穢還家夢亦香未能憑古語安處是吾鄉

黃虛谷

名翔鳳
字子羽

以唐體五言一首來別次韻餞其

歸

我欲話時窮非翁誰與同
老來有兩健春到得相逢
潮水明朝櫓雲山後夜鐘
相思無盡處尊酒幾時重

次韻天台陳榆收

名景參

世態自浮輕猶存冷處盟
功名隨泡影道義要權衡
打破片雲隔來分半日清
且須謀隱事未問把天擎

似史和甫

名祝伯

傳清

翩翩鶴往還高眼看塵寰
家世崔盧上風流晉宋間
開

門種桃李落筆動江山勲業時來做青春贏得閒

用長兒韻謝黃長孺酒

薄俗方沉溺親情自酌斟雨聲書屋冷春意酒盃深危
世不多話醉中時一吟明年如老健此會得重尋

本堂集卷九

欽定四庫全書

本堂集卷十

宋 陳著 撰

五言律詩

次韻虛谷和長兒奉別

有便勤相問何時得近依
詩搜腸藿瘦字為眼花肥
雲遠心尤遠春歸人未歸
羨君牢閉戶珍重白山衣

雨中旅懷呈鄭耐軒

日日約歸舟誰知雨又留滿城為海市數步有蓬洲濕
夢風難送急心天與仇今朝好晴色著履可來不

又自用韻

泛泛一風舟誰為管去留兒翁忘市井女友隔河洲聊
爾詩還債從他笑有仇山林元自好明日得歸不

城歸憩吳竹脩家以詩寫懷

去時桃未蕊歸見石榴花白首燈前酒青山夢裏家鵲
聲心路梗蚊毒面皮麻勞苦書生事堪嗟老未涯

留西山

西庵已非舊庵居
猶自妍樹頭擎月直
山腹轉風圓
閒坐忙塵外
清談濁酒邊
悠悠一俯仰
今日是何年

次韻齡叟招石秀叔

久知難久別
飛約到柴門
喚起雨窗困
踏開嵐徑昏
世情忙外看
交道淡中存
何日已公屋
新詩得共論

齡叟以詩來壽余次韻以復

彼美慈雲叟
相存馬少游
槐淘參玉版
藻句粲銀鈎
外

友更誰在前緣曾共脩從今各珍重萬事等虛舟

宿洞真觀呈盧竹溪

名應龍
字致遠

傍家新築好儒道不相妨松火客牀夢梅花詩屋香欲
盟六逸醉始託四明狂高視黃塵表條然何有鄉

黃虛谷守歲有詩因次韻以自寫

盤花明日頌草草數盃先醉以客呼夜老嫌人問年那
知新換歲得似舊安眠浮世自多事春風無棄憐

似永固主僧惠福

偶來乘暇隙又過古禪林
白日鐘魚外清風竹樹陰
無言自有趣得句亦何心
相見不相問老僧知我深

與內姪汪景淵西窓小酌

窓下綢繆處尊中感愴初
難危親話重脩阻見時疎
老別堪三載交談勝百書
溪山已非昔爾後更何如

次韻梅山弟見懷

自笑緣何事老來還客中
唱花悲杜牧隱枰愧梁鴻
頗憶長眉白相歡醉面紅
如今各成別方信生天窮

謝王景之

名果

用前韻見寄

詩卷舞西風飄然入眼中健回追電馬清落唳霜鴻遺
我寶吳縞逢人稱相紅但存山上果誰道剝為窮

遊淨慈道中

衰年少出門信步遇冬暄黃葉問梅路青烟芟麥村危
時一自適造物萬相闕試與松風約尚堪來幾番

登慈雲閣

倘徉古梵宮如坐畫圖中峰礙半山日閣來三面風靜

觀知物變老話入僧空莫訝攪門戶吾今已禿翁

次韻內姪竺稷

字克佐

并示諸兒

春首還相見吾懷白與兄江湖關老夢山野避新行危
慮船迎浪殘生漏送更東風溪上路欲別苦為情

避難西坑用瀹韻

頭禿鬢蕭蕭誰知生轉勞危心貪避遠老脚失低高薄
采義山蕨難逢仙徑桃如何是歸日世事正囂囂

丙子丁丑年避難南山之西坑今春投北山兩雪

竇間其地名適與前同因記以八句

西坑曾避難今又一西坑十有四年夢兩番多事驚天
乎存老息地亦定前名何動不關夢怡然心氣平

次弟觀似單君範一首

可人忽相訪忽忽應燈花古話違時樣霜毛感歲華雨
中書枕榻山下菜羹家一笑君聽取歸期待白鴉

即事

出門問春事猶在可疑間雲弄欲晴日風堅曾雪山千

林芳信遠百鳥好聲慳要識天珍重時光漸漸還

元夕風雨

明日又元夕村祠一閑人溪山渾是雨燈火若為春忍
見饑成鬼癡將飽望神誰知生意處官好自憂民

醉中示梅山弟

浮生無足處樂事有誰真風雨少晴日弟兄能幾人清
談流俗外薄醉小窓春栩栩投牀夢方知造物仁

即事

新正已強半連陰凝不開雨聲嚴似雪春色瘦于梅老
不問花事病猶須酒盃東風自時樣于我亦悠哉

過梅山弟家

好景在西林晴邊取次尋路融山脈水屋戴樹毛陰動
脚影為僕舉頭天見心清風知酒病吹我兩衣襟

脾疼大作

頭童面菜色七十八年間聊把吟移病何曾笑答閒老
妻愁日計弱子怯時艱此意有誰會門前溪與山

齡叟招飲醉中

一笠出雲深，因緣坐到今。
寺窮僧自飯，山古樹方林。
借酒看人醉，燒香駐客吟。
相攜不覺笑，門外少知心。

二月十日送女清出適還次韻弟觀代主留客

弟胡為自專，宴客數朝連。
敢越庖中俎，甘安肋上拳。
滿腔虛醉飽，一段惡因緣。
事過姑休問，風流記剡川。

次韻黃長孺

山谷忽精神，一番桃李新。
盃盤流話處，燈火苟安人。
老

金史卷一百一十五
卷十
去客為歲醉來寒亦春催歸莫閒管此處豈天津

送張子喬

名喬之杭

文旆舞翩翩西征興浩然樹香三井路花影六橋船
酒貴難為醉詩清易得傳丈夫須衣錦寶重黑頭年

似天寧寺僧仁澤

禪窓小有天一見喜登然壁畫詩為重簷花菜共妍而
翁十暑別于我百年緣此日相逢處勝如三笑傳

答天寧僧宗苞用前韻來見

佳月好風天詩來眼豁然定心生古韻淡態洗春妍一
面總如舊五言相結緣尚能茅屋下賸把已公傳

深兒歸自杭梅山弟有詩因次韻

兒歸喜欲泣難說與他人老眼無湖海初心有鬼神行
將八十歲別可又三春自信天堪靠寧教做獨民

本堂集卷十

欽定四庫全書

本堂集卷十一

宋 陳著 撰

五言律詩

似仁澤宗芭

來訪寄牕師
新田雨茗期
涼生開酒量
香妙醒詩脾
半日舊來話
古心他更誰
要知夢非夢
試問兩相知

答前人用前韻來謝

莊老自堪師浮生何可期空將書拄腹安得樂封脾年
事老如我歲寒交有誰偶然歸不去又被若人知

與天寧寺主僧雲岫對坐偶成

瀟瀟風雨裏得得又開門兩榻蕙蘭壁半簷花竹村鳴
蛙藏綠暗歸翼帶黃昏此景少人會相看付不言

寄慈溪赭山寺居僧如岳

薄俗久淪胥交心獨抱初孤岑千嶂外兩載幾行書歲
晚梅花瘦江空雁影疎相逢不相見近況定何如

次韻達觀弟送法椿長老入杭

與師交際狎弟後我居前久憩上方閣忽登西浙船
翩然如過鶴聽不到啼鵲心契無千里詩盟終有緣

次韻天寧僧宗芭見寄

新詩忽相問知我有如君陶令早還里少游終守墳
犁鋤聊自課筆硯未全焚時放出門步仰天看過雲

到白水有感

吾氣已衰颯茲行增慘悽近行雲易雨積水路如溪寒

食紙錢樹舊遊莎草畦顏牆獨立久百感付鶉啼

見童志道舊居已非有感

人亡屋亦非世事已堪悲遺樹老于我故山春為誰論
文歸一夢閉眼立多時默默無言處東風知不知

次韻仁澤僧來見

嵩溪脩竹下一榻坐幽深時異交遊少年衰百病侵生
涯成鳥啄村景付猿吟惟有相從夢時時到梵林

次韻張子喬來見

人生自多事本是一蘧廬忽忽夢柯外累累炊劍餘清
吟投病枕細讀當醫書此去更何日相過話索居

日峯庵

便道得幽尋西風引入深庵依山石脚僧說老巖心到
處鬼無墓此日松獨林人生竟何事搔首立清陰

寄婺州石君瑞料院

名德祥

靈光猶歸然久別忽書傳風雨各閉戶山林多謝天眼
花千里外心事十年前獨為兒曹喜通家契有緣

同離孫童蒙遊淨慈

三月第三日又來遊梵林醉言驚俗耳貧趣契僧心犬吠落紅外鳥啼空翠陰一年最佳處分付老齡吟

次韻胡甥幼文

字德華

留別

壻車俄見過喜氣動庭莎別久一來重病餘相問多親情忘淡薄歸興及清和山路須回首長松有翠蘿

送春酒邊

今朝天氣新聚首見情真園木相看古池魚亦詠春山

林如此酒宇宙幾何人堪笑塵埃世興懷石季倫

余自邑歸唐溪袁仲素

名清

之兄弟拉歸宿次日

苦留連偶病以八句辭

家世厭風波來居空翠窩山深秋意早溪近夜聲多似
夢忽到此欲留如病何眼前渾是趣未得細吟哦

到梅山次韻弟蒞

山家見禿翁歡笑走兒童坡竹勢飛動楚蘭香暗通盍
分半席地相扇一瓢風世事非吾分何妨詩自雄

次前韻

相對兩衰翁此心無復童
幸叨無事坐貧久有財通菜
粥琴書畫梅花雪月風黃塵
在門外勞隱是英雄

梅山醉後過丹山

醉揖梅花塢意行來佛廬相
看如一夢一別又年餘話
到供無粥笑言園有蔬杯茶
出山去拍手謝鐘魚

次前韻示弟蒧

梅老竹疎疎先人有敝廬
偷生俄八十課子尚三餘脚

軟安憑杖牙衰爛煮蔬天猶嫌過分時復病河魚

次韻王得淦長至

二十四節氣來自混元前老息他無分新陽例有緣從
教寒又暑慣得海為田此理須看破何妨日當年

正月廿四日到梅山二首

困來禁不住一動亦悠然家事青山外春心白髮前逢
人相問歲為客又開年得醉梅花下何妨就石眠

梅花草屋邊好景得天然夢境閒為上歸途倦莫前無

情推醉石有分是流年已約重來日白雲就醉眠

正月晦日與弟觀對酌

聚散等風沙相知要當家弟兄窓下酒世俗眼前花
隱去方為福貧驅未有涯明朝吉凶事分付與昏鴉

四月三日與家人小酌轉官毬花因成八句略為
花吐氣也

紅芳銷歇後天質最分明剪襯青雲薄團成白雪輕
官途榮進取時樣妄推評本色相看處幽窓不世情

次韻雪竇主同少野見寄

誰肯寄哀翁當年應夢熊
知心厓惠遠載酒壽揚雄
古道今猶在清交老更豐
和詩不盡意極目萬山中

次韻洛陽秦慶父

名吉

贊見

洛中人物好磊磊實過名和氣
春浮動清詩玉琢成
相逢交義重一笑世情輕
問到牡丹外淒然百感生

示王侑翁二首

垂髻已解吟髻髴學何陰
暗動梅窻喜遙傳桂種心
染

聲毋市井近拙要山林耄矣不成句中間意自深
碩果生機在從他剝五陰南山四時面殘屋百年心家
薄有書種客多成笑林要閒元自老不在卜居深

到西山懷趙景文似諸孤

山屋著孤嫠采薇人更誰寒燈長夜影春帖去年詩後
死祇多感獨來能幾時願言相勸學西席竚賢師

次韻林芳叔

名廷玉

夜雨立春二首

今春第一雨漠漠隔窻紗莫管妨燈節惟憂釀雪花報

晴俄喜鵲吠蚤底嫌蛙不自知年耄隨人樂歲華

官府年頭事山中知未知更新夏正朔依舊漢威儀病
脚春扶起歸心雨壓遲東家未吾厭飽飯細論詩

次韻林國器

名公輔

元夕

世情多異好幻出滿城星城市非無色醉鄉風亦腥從
他兒戲哄輸我客眠醒老耳虛鳴處笙歌足自聽

次韻張子喬見貺

自笑我何如叨年八十餘戶門覺老病梅竹護窮居拙

計信天鳥殘生減水魚時將一字命仰臥向空書

次韻王得淦和兒

泌

西山所作二首

門徑不為深溪山巧帶襟老來無過計貧極見初心
兒謾煮饑字甥能賡醉吟不羞狂脫帽無髮可勝簪

親戚要綢繆其來遠有由溪山行可到歲月去難留
休問酒無有但將詩應酬春光足堪處不是少年遊

次韻王監叔二首

青山綠水鄉竹裏喜還堂犬竇可曾警雀羅何用張
苦

詩誰是甫問字我非揚有感飛霞佩相從老不忘

古道在山林還從冷處尋醉時詩落紙夢裏鶴隨琴歲
月悠悠外乾坤浩浩心何妨且留住風雨是知音

四月五日後圃酴醾芍藥侍郎三花盛開醉中成

三詠

酴醾忽盡花春與夏交加頃刻當千日風流能幾家香
散迷粉蝶曲蔓走青蛇火急要清賞可人歸未邪

芍藥又將開那堪夜雨催密鋪萱草襯巧傍牡丹栽省

砌休思着揚州曾看來芳菲際如許俯仰亦悠哉
芍藥圃中央有花名侍郎叢叢嬌翠羽孳孳淡紅妝鳳
閣樣如夢雞冠班自行何當付一醉歲歲有春光

本堂集卷十一

欽定四庫全書

本堂集卷十二

宋 陳著 撰

五言律詩

次韻孫興之

名夢金

見寄

江山百里餘相得肯相疎寄雁苦無便遺魚俄有書
心能謙以下義得兄之初耐久難忘處我將銘陋居

次韻泌雨後

秋來苦淫雨轉見我衰殘餘息朝陽露危生風浪灘病
深多夢藥涼早入披禪萬事有天在隨時且放寬

送嚴心傳

名得桂

鄞縣學教任滿

賢哉昔魯山心地出芝蘭不負義方教相傳本色官三
年根脚正萬里路頭寬須信功名事要教人耐看

次韻東方趙孟益遊北山寺

瀟洒一僧關錢家古墓山雲多迷早晚溪澗限忙閒齋
鼓青龍麈魚歌白鷺灣欲吟吟不盡巖溜自潺潺

次韻遊南山寺

紫蓋矗天開更無山並來脚飛雲外去眼到海東回長
嘯落林葉新題淋壁苔茲遊亦奇絕休惜醉徘徊

次王得淦韻

浴出矮簷陰披襟小雨侵坐涼三鼓漏和夢一燈吟自
分死中活誰知升與沉明朝書局事奔走豈初心

遊鹿苑寺似主僧漢仲章

隨人入寶坊一坐到斜陽僧老話多古春來山自香放

吟聊走筆乘興不論觴今日是何日悠然何有鄉

謝前人

意行非夙盟一見眼雙青款接生如熟高談醉易醒夜
牀清老夢晨粥洗餘腥須踐楊梅約重來水月亭

送邑宰丁既之

名齊

解任置酒取別因賦示

古道轉悠悠送君那值秋惡懷心似醉苦語去難留燈
雨今宵酒帆風明日舟從今夢相見老眼在心頭

送蘇松軒路教

名歲

解任

三載多材地一團和氣鄉蛙池疎道脈蓬島矗文芒
日歸舟穩春風驛路長詞林是氎舊此去足翱翔

到西峯寺見弟蒙所與僧

照熱

屋詩因次韻

因便入雲山相逢話晚年慣吟茅屋下時打葛藤前
應世未圓覺無人識聖巔滔滔兒女境猶抱穎師絃

到香山寺似僧能子良

當年真應老

楊禪師封真應大師道場

坐斷此名丘交障鎖山定曲

溪依路流聳肩擎佛迹

寺山西絕頂有寺名佛迹

有脚踏龍頭

寺山東有

龍頭形勝不可盡平生償一遊
鹽場

似雪竇西麓庵僧昂蒙鈍

已公卓錫地來此一支筇詩話半窓日禪機萬竹風悠然相契處付與不言中長揖出門去水流雲外空

次韻洞真道士盧致遠

虹橋開福地門外任風濤襟帶金鐘秀根基鐵柱牢安心培大棗辦手摘蟠桃坐鎮江山穩新頭立石高

似法椿齡叟

人生契合處信是宿因緣坐到無言外叅成有佛前好
山非昨日啼鳥又今年帶得醉歸去醒時風滿天

次韻東臯寺主僧見寄

平地起叢林工夫歲月深百吟三教髓一飯十方心慣
聽人傳說閒將夢去尋書來足自慰亦是老知音

次韻弟觀留慈雲

相攜入翠林聊爾豁塵襟恃熟出家話得閒生梵心涼
多却扇坐困倦把詩吟試問虎溪上多情如此深

萬壽寺主僧圓鑑留酒醉中

人世一浮漚時光如瞬流相違十年久偶見兩心稠
法嗣驚初意香厨出異羞那知年到此不枉少遲留

次韻留友直道士來訪

九六盪摩中幾人閒處同浮生絲傀儡後計石婆翁事
事休休過時時咄咄空何如仙羽健來往傲方蓬

遊鹿頂山

茲庵擅佳境一到願方償鐘鼓江湖笠琴棋水竹房相

逢多故舊小憇得清涼自笑因緣淺又催行路忙

次韻僧仁澤

號雲夢

來詩自有師心與晚唐期開我正牆面喜于聞樂脾山
林人似許風月事還誰不用盟為社從今是故知

灑灑忘家客相逢若有期茶腴叅道味詩瘦出饑脾避
俗無新計談空更阿誰吾言太浪蕩休遣世人知

又次韻前人

來遊大梵天邂逅興悠然一見新猶故相忘醜亦妍藕

花詩有句蓮社我無緣不必叅禪話詩燈自可傳

本堂集卷十二

欽定四庫全書

本堂集卷十三

宋 陳著 撰

七言律詩

次韻孫古巖冬景

臘天風景最無常
兒造顛狂亦有方
將放雪飛連夜雨
欲留晴住一朝霜
城頭柳色吟邊動
山曲梅花夢裏香
身在黃塵三尺外
靜中無日不春光

次韻單景醇

東風先遣白花開，坐後妝梳殢鏡臺。
雪艷慣逢風落絮，雲香不到雨成梅。
下交芍藥當堦發，高伴金沙上架來。
珍重美人收拾去，春衣分馥雅持盃。

浦城外界梨嶺西水碓頭阻雪三首

小小藍輿出遠林，南來長苦路嵌歛。
一千里外鄉山杳，十二月中風雪深。
清夜到家惟有夢，少年觸事易酸心。
須知行止元非我，陰六陽三古到今。

定海

一夜南風便葉舟
天教償我定川遊
兩崖踞海潮吞脚
萬石封堤水掉頭
家家活計魚鰕市
處處歡聲鼓笛樓
不用丹青狀風景
逢人且說小杭州

宿靈石方丈

即永固

偶因塵隙遊靈石
不覺夷猶到夜深
坐到半窓山月影
參成一片白雲心
寒螢着露更相調
老葉無風也自吟
分得僧牀半僧夢
夢闌詩料滿山林

謝童志道書

相逢一歲一開懷，不奈怱怱兩望賒。
絨口已生愁裏棘，共燈空結夢中花。
芳林丹桂君須折，厄閨黃楊我自嗟。
猶喜鄮峯雲一葉，故教風裏到天涯。

夢中得詩二句，王景雲聞之，擬成八句來因次韻。

浮生誰不愛名成，未到頭時未是名。
不意事多人易老，

知音者少路難行。
夢中二句清閒信是終身福，得失須教一

念輕。林下有家歸有日，離騷聲裏聽猿聲。

回家

為嫌客悶轉還鄉到得還家夢轉長
密友會疎心欲折
貧家事富擔難當
秋山有態忻新雨
風葉無心怨夕陽
此景勸君頻記取
免教詩社報淒涼

張氏館中早作

小牕一榻清于水
親戚相看話久睽
困帶詩情投角枕
夢隨梅伴策霜藜
鄰家落杵催樵爨
山寺分鐘撼竹棲
犯冷披衣捲簾立
小丹山在翠樓西

病起

西風喚起眼中仙
竹榻饒涼不愛眠
數樹秋聲窓着雨
一簾山影屋浮烟
案頭古帖無完紙
壁上焦琴不具絃
小摘畦蔬炊脫粟
與妻閒說孟光賢

次前韻謝月牕兄見和

人得清閒便是仙
秋光堪畫欠龍眠
瀉簷纔歇催詩雨
入戶驚飛落紙烟
句與杜陵同中律
世無鍾子莫知絃
籟鳴機動聊相友
捧硯猶強武士賢

次韻竹憲兄

名元龍

委順齋

知君委順是心銘
揭以銘齋豈浪名
夜兔晨鳥真似夢
秋蟲春鳥不關情
人生未死終歸困
天道從來不益盈
我亦當今知命者
請於此處話平生

竹憲兄因猫捕雞日因夜縱有詩自憐因次韻

坎止流行不在人
人生只合任天真
無聊勾踐能興越
垂死范雎終相秦
病足不妨登上袞
顰眉休復效東鄰
竹憲悟得窮通理
雖致狸奴許自新

孟春書懷

老健義娥不住車東君依樣做年華十來日雨洗梅夢
一半春風歸杏花醉裏出門忘故我閒心到處是吾家
臨溪忽悟前程事流水方生未到涯

趙氏樓偶成

過耳南宮捷奏鈴功名宿夢頓呼醒清風席上龜占古
細雨樓頭鵲語靈袖裏珍文稱白壁眼中霜顏脫青萍
問津當繼宣何躅要得人言更妙齡

次前韻謝同樓諸公

凝香畫閣畫聞鈴
喚我真心十倍醒
奮臂勇尋西學侶
回頭愧謝北山靈
京華是處薪炊桂
旅食何妨實剖萍
此去功名如到手
也須伏闕疏延齡

入京到西渡

昨宵北渡今西渡
繫是離家第二宵
詩伴風流勤犯驛
權郎醉飽健迎潮
文亭浦近鄰州接
筆架峯迷故里遙
得意歸來期可數
榴花如火照高標

吳宜之

字南

生日以一詩勉之

伍山鍾秀出人龍頭角崢嶸意氣雄須着父兄深責望
好從師友細磨礪始勤却是終身福下學方收上達功
他日前程相約處杏園多少馬頭風

遊西湖

罨畫溪山入望迷工夫都在禁城西松蘿霽鵲羣峯寺
楊柳輕風十里隄酒向朱欄樓上買詩從翠館壁中題
都門路迫馬蹄困奔得歸來醉似泥

過鑑湖

越城勝境素來誇，纔入東關分外嘉。
八百頃荷西子態，幾千餘寺賀君家。
畫屏山色饒烟水，麗錦天光落晚霞。
惜景欲圖湖上住，釣船泊處是生涯。

次韻劉生秋夜郊行

護索郊行秋夜抄，無心萬籟自悲鳴。
月林散葉風前下，村舍孤燈夜半明。
暗裏家山應在望，醉中砧杵不關情。
歸來東榻鴛衾穩，應笑詞人怨五更。

題西四明趙氏書院

他鄉久客不堪懷
風雨書窓又獨來
夢惡喜聞鶯喚醒
歸途羞見雁聲回
望春山色今須好
年少時光老易催
坎止流行天已定
掀髯一笑且銜盃

首夏

花塵絮雪已茫茫
一景清和便可量
脅霽驚風眠秀麥
尾雲疎雨健新秧
鶯啼未怯隨春去
犬吠相催入夜長
酒興詩情都懶散
祇將清夢試藜牀

春殘

出門隨意踏蒼苔
過眼時光一笑陪
二十四風清繡地
兩三點雨試輕雷
纈空舞絮隨春去
鈿水嬌荷闌夏開
對景傷心兒女事
肝腸無奈祇銜盃

乙卯鄉貢鹿鳴宴次韻

結髮書癡氣吸川
壯年纔得預賓筵
射穿楊葉心何武
夢入梅花骨已仙
設席肆筵勞送上
着鞭跨馬欲飛前
令君早晚朝天去
桃李妍春正耐烟

送胡檢閱

名度

塵鞅紛紛走畏途
眼中得見古璠璣
利名抑未有知己
骨相雖癯却飽書
已把三長脩信史
應無千斛到清居
文章到地此為最
鳳閣鸞臺次第除

吳江縣作

保佑六年七月二十七日往鎮江考試

不行浙右已三年
却上今秋考試船
文禁何妨鷗鷺狎
厨供旋得蟹魚鮮
遠山浮動太湖浪
密樹冥蒙小市烟
及過長橋風正惡
倚蓬無語看清天

長橋望湖

太湖缺處束為橋，搃把吳中景色包。
去百里間山獨立，跨三州地水平交。
古亭休說曾垂釣，長劍何妨更斬蛟。
欲覓鷗夷無處所，如今祇自網船拋。

送沿江制使姚橘州尚書

名希得

自金陵赴台三首

自紫巖來百載餘，我公德量世間無。
官高也祇如韋布，家慶真堪入畫圖。
忙處轉多閒氣象，平時惟做實工夫。
此行當坐經綸閣，須念蒼生已及膚。

閩寄當今第一難三年裘帶笑談間
寬扶民力野聲樂
靜壓邊風江水閒
福地有緣鍾阜住
清朝却詔履星還
過家聞說須留憩
荷滿江洲筍滿山

當年赤手戰南宮
道眼收歸造化中
欲把一陶成異日
已教兩度受春風
登門英俊知何限
着意孤寒却最豐
但願身如秋後菊
橘州深處寄深叢

咸淳元年乙丑冬同金陵制幕諸公遊舊烏衣巷

新來燕堂制叅董靜字

居烈

有詩因次韻

王謝風流墮渺茫
黯然懷舊見新堂
山無多樹夕陽遠
梅始一花春意長
燕去有時來畫屋
鶴飛何日到青岡
休言枉洒新亭泪
猶勝如今似醉鄉

雲西已矣江東漕
司繡春園柱間詩
尚存因次韻

以寫感云

陸雲西名獻字
景思陸佃之後

柳邊桃杏竹邊梅
盡是先生手自栽
舊事已隨春夢斷
新愁偏入老懷來
空將滿柱留題看
無復常花畫冊開
試上層臺望秦望
鄉心禁得杜鵑催

自金陵趨行都過顧城湖三十里水光接天但風
逆不可帆午間到銀林登陸雨作

沿路連朝天逆吹今朝登陸雨相隨自緣寒素例難阻
非為老蒼私控持山色青青無世變梅花皎皎是心知
眼前有景足相遣到闕何妨數日遲

聞伯求弟鞠獄明允今日行刑而雪應祈喜而賦
詩

勅香勤雪未如期誰信沉寃在獄扉玉闕曉俞三覆奏

瑶妃夜剪六花飛從知刑罰分明處最係天人感應機
喜極吾家有宣靜眼中瓊樹轉光輝

次韻子蒼

名琦

二首

清溪遊倦又浮家帶雪來觀上國華飛檄有聲爭致藁
通閨得薦已攢花立看雲雨蛟龍起坐笑春風鳥雀詳
好向江湖忙着句回頭綸鳳出南衙

君學柯山我學家相逢悃幅兩無華有緣偶食金陵粟
連歲同聽玉樹花各占路頭圖展布不隨人口關喧嘩

向來平實交相勉笑殺癡心古押衙

次韻史猷父鄉集

兩賢主禮一般春還是慈湖里曲人久曠忽行知世變
相逢交賀見情真發身清苦盟方暖回首榮華迹總陳
更看他年陪菜酒耆英會後接芳塵

岷縣次韻趙主簿

為長於斯愧善羣那當世事日輪雲吾寧忤俗少行志
誰忍欺民上負君臨政可能皆冉季讀書均欲致華勲

有澹臺者良知我嘉惠新詩不敢聞

本堂集卷十三

欽定四庫全書

本堂集卷十四

宋 陳著 撰

七言律詩

嵯縣次韻答過客常德慰覓酒

潤明欲學醉陽城
種秫無由謾着情
渴枕誤成顏玉夢
空槽寧有滴珠聲
去尋雲島人非俗
吟到雪溪詩轉清
鄰瓮夜賒聊送似
知君已洗大蘇觥

嵯縣解印回家東郭道中

過雪溪前第一灣
面前境界儘寬閒
猶聽人說我知縣
誰識身知前住山
民社三年憂責外
家山百里笑聲間
最堪喜處交情好
明月清風心往還

剡民望回再回剡宿陳公嶺

夜宿雲間第一峯
一雞鳴動萬山空
薄餐菜飯留中火
牢着忙鞋踏上風
高處更無塵隔礙
滿空惟有理玲瓏
此時此意平生樂
山下人誰此樂同

出剡北門道中

晴日烘冬宿掃陰
藍輿伊軋出山深
田夫忍凍張旗帳
學子忘勞走佩衿
三載一餘多少過
萬人相送獨何心
新官便好觀風俗
莫道無人識古琴

到徐晚村點木簿三首

江雲薄薄弄秋晴
小小藍輿款款行
才出晨光山自別
稍迂石險坳方清
峭崖全是古銅色
好鳥畧無京樣聲
林下住家圖穩靜
近來此處亦多爭

關

卷十四

出門猶有夢悠揚五更風裏秋初旺

十里湖邊雨亦香才出江頭腥滿市却行潮脚淖濡裳
關

山民墾種不供炊專把山林抵歲支父子風濤關性命
官司分付取便宜澤梁無禁是三代竹木有征何待時
便盡放寬能幾許低頭不問只攢眉

甲戌考類試院呈同官

天風吹散樸衣塵奎壁光中預校文老眼可能私李豸

公朝正欲第劉蕡平生涇渭豈無見暗室雷霆如有聞
一雨快晴秋意好預占太史奏祥雲

本堂集卷十四

欽定四庫全書

本堂集卷十五

宋 陳著 撰

七言律詩

次韻梅山弟惠雞鶩

手製雞鶩味可知
兩書走餉慰窮饑
可能夜去聞聲舞
却效早鳴逃難遲
伴宋讀書知已久
止由為黍愧非宜
從今定入餐松約
分付饕涎莫再垂

次韻前人醵更生會三首

滿天地裏暗塵飛老息奄奄一髮危
種秫為生姑託醉
采薇忍死未忘饑
三間書屋鬼神護
百兩芒鞋風雨知
咄咄書空如夢寐
龍山誰記有佳期

劫火吹炎海水飛九州同沸釜魚危
有時杜老泪盈把
終日顏回面忍饑
今古滔滔無限事
乾坤納納竟何知
便教強趁黃花約
終恐趨趨罰後期

世變如輪到厄年
危魂飛遶萬山巔
冥心前路追陶令

回首中原屬漢淵
樹鵲頻驚枝上月
醯雞苟活甕中天
悠悠未是歸時節
風雨何時復對眠

次前韻示前人

人生不料有今年
知汝扶親走翠巔
動脚可能無陷穽
保身正合懼冰淵
夷傷無奈明歸地
坎險惟將心靠天
豈意老驅幾折臂
未能扃戶日高眠

次韻前人訊余遭蹶之苦

桑榆正要補東隅
與子初期繼二疎
鐵馬漲塵難着脚

霜猿引徑各傷膚苦勞筋骨寧非福剝落皮毛不管癯
賸欲寄書相慰藉呼兒頻問雁來無

避難周姓家獨眠偶成

夜宿山家謝主翁安排蓆藁地爐東枕頭就借支磯石
帕額聊防箭隙風酒瓮下眠添古話牛衣中卧有時通
老吾看破人間事錦帳牙牀總是空

周翁留飲酒

曉對山翁坐破窻地爐撥火兩相忘茆柴酒與人情好

蘿蔔羹和野味長外面干戈何日定前頭尺寸逐時量
而今難說山居穩飛馬窮搜過虎狼

余牀帳為過兵捲去答梅山弟用余韻見寄

一牀破帳護衰翁席捲俄隨掠騎東與婦同圍膚炭火
呼兒排作肉屏風從來不起羊羔想困倒何妨蝶夢通
亂世流離多露宿蓋頭有屋未為空

十一月八日全家避難周姓家終夜以楮拙火用
為禦寒之具

獸炭銀山醉夢鄉何如楫拙地爐香微烟暖火權春燠
錯節盤根傲夜長夙許孤寒陪煖席不將光燭買烘堂
風餐雪虐天昏黑獨占山家一脉陽

長至日山家偶成

疇昔隨班舞御香如今忍凍坐山房臺雲誰取書黃瑞
宮日空舒刺繡光懶把酒盃心自醉聞歌肱枕意何長
晚窓閉眼消詳易賴有生生不斷陽

次韻內兄舒通叟大博

名津

寓雲南僧舍

河海翻飛信有由相逢莫學楚囚愁人方椎髻說蘇子
天把布衣存武侯世變古今張與翁人心造化去中留
雲南高處應看透許得溪翁入坐不

又次前韻

吁嗟天數不人由舉目江河萬種愁為鴈可無忠義鬼
覓封忍見笑談侯功名只作無時看氣節須存險處留
歸去來辭非浪賦曾知此老此心不

三次書懷

默察天翻地覆由寸心無處著私愁忠唐不復瞻雙廟
誤漢皆知罪五侯牧馬入南飛淍水將軍遵北感陳留
山川滿目花如舊邂逅春風可問不

四次寄意

正大從來不徑由窮崖今却伴猿愁栖栖宇內知師孔
矻矻人前愛說侯昨夜撞鐘搜句到他年籠壁把名留
崆峒麥熟關時事此意還曾入詠不

聞西兵復至又為逃隱計二首

千村奔走浪塵沙，又報西兵沸鼓笳。
危途無處問生涯，孤燈閉戶一山雨。
遠夢當書二處家，最怕入深飢。
莫忍難逢流水出胡麻。

軍心多似撒星沙，夜月猶聞奏月笳。
尚有空囊隨杜甫，幸無複壁累王涯。
草根木實逃生飯，石室泥龕到處家。
天下蒼生是誰誤，當年悔不壞庭麻。

中和節寓山庵

小庵亦是小桃源，時事方難住更便。
啼鳥落花忘客主。

青山流水見因緣得過一日是一日浪說百年誰百年
分付妻兒更深避掃巖趺坐學枯禪

二月十八日過邑有感二首

植杖東風立曉寒淒其極目甚窮邊黑塵猶暗新焦土
青日無光老晦天花鳳逢春誰借景杜鵑懷古自啼年
吾今且忍須臾死得見生平或有緣

說着時難心亦寒斜陽焦土更無邊故家空夢鶯花地
殘戶不成蠶麥天造物未應終絕物今年莫省是何年

鬱攸獨免侵鄉校也向斯文要結緣

次韻梅山弟感時四首

吟情本是謝元暉邂逅年來世事非到處望中千甲解
無人留日一戈揮杜鵑入洛啼拚死鴻雁辭南去有歸
浩蕩春光千萬里孤雲葉葉向誰飛

世事滔滔趁多暉仰天咄咄付非非乾坤誰解中撐拄
江海方聽北指揮風舞南人新萬戶灰颺西嶺舊三歸
只應天竺孤峯在一自飛來不更飛

春造曾分寸草暉晚經霜雪始知非中心痛事神孤往
前面虛名手一揮肯使曉猿隨隴笑不煩倦鳥引雲歸
絕糧只管餐松菊贏得身輕入險飛

邊將才無日越暉中朝人是李斯非順流兵馬竟掀舞
死戰規模誰發揮忍看金莖移露去空歌玉樹空春歸
不圖世變今如此真與塵埃蝶翅飛

次韻董伯和名麓二首

事難言處只長吁沸海烹煎一鼎如貪累轉添知有命

故交自絕本無書仕方見境大槐蟻走不離鄉千里魚
已分歸農謀半菽尚憂尤歲起秦閭

時難何必苦嗟吁自有山莊只自如行擔應攜杏花譜
閉門堪着竹林書靜觀塵外乘風鶴坐看人間減水魚
宇宙平安終有日却從舊卜大門閭

次韻弟觀到蔡峯莊

簇簇羣山似鐵圍中間着屋與山依園多芋栗佐清飲
池足芰荷供隱衣疇借搬家牛自跨有時見客鶴先飛

未宜回首林丘舊，賸把詩脾厭翠微。

次韻前人寒食

今年寒食倍心寒，不獨松楸感涕潛。
青草遙悲新瘞塚，蒼梧誰認舊來山。
人生醉夢乾坤裏，時節晦冥風雨間。
只有杜鵑知此意，傍雲歸去又啼還。

次韻前人訪舊

鐵石心腸本自頑，著身無所奈時艱。
仙舟難問桃源洞，詩笠聊尋飯潁山。
道義豈隨天地閉，風埃不放水雲閒。

相逢休說如今事回首斜陽古漢關

次韻前人傷古

當年天與袴中兒天到如今不與時事變風濤掀地軸
軍聲電電散雷槌鬼藍柄國苦相誤佛會守城甘自癡
旗蓋已知隨駕去留西太乙更誰欺

次韻前人形役

誰能禪寂效裴休自愛清名慕李舟雲露中年開轍迹
風波晚歲轉船頭見花如刺時難痛遇事生根老滯憂

但欲漁樵相爾汝怕人知我問來由

春晚課摘茶

玉川子後自吾生自課園中拾晚榮攪雨金芒排世好
飽春翠辨見天成不煩鉦鼓騰山噉臘有旗鎗戰酒兵
鳳舞賜團今絕想只憑苦硬養幽清

次韻梅山弟感時

翳日腥雲瀕洞塵是雖天做亦由人難禁老泪如囚楚
忍託空言寫過秦風雪正培陽氣脈山林幸有歲寒身

功名已付無何有要及餘光耕富春

三月廿五日釀飲於西峯寺分韻得因字

牢穿不借踏青晨信與林泉有宿因忙裏偶成真率會
醉來不省亂離身歸途西嶺何妨晚吹雨南風正送春
燒筍煮茶須再到一山古意要詩人

次韻董聲可重五

人事俄隨世事殊尚存榴艾伴嘻吁懷沙到處哀新鬼
瑞市何時見醉夫榮賜休思當暑葛早衰空感望秋蒲

避兵禁惡同兒戲無計能逃急急符

次韻弟觀喜雨二首

天勅龍瓢到底傾阿香飛駕會蒼冥風霆震疊四溟立
宇宙清涼萬物醒行蟻知機先畏濕升蝸向上謾遺腥
平生霖雨蒼生志對景空懷海眼亭

世事紛紛付渺茫且迎雨信看農忙鳩聲隔樹宿雲濕
牛影落田新水涼處處叢祠羣卜稼家家蓐食早炊糧
及時種得苗青活便覺秋風飯粒香

感時二首

國事如今到底輸九天難叩哭窮途精忠無一郭中令
異志居多劉寄奴經哨地空如大漠逃生山險甚飛狐
回頭鐘鼎王侯宅今是誰人便泰芻

一點忠忱無處輸與滔滔者走危途新聲感泣尚書客
破鏡傳盟宮主奴流散莫非中澤雁死亡誰是首丘狐
平生師友多黃土吞哭何曾奠束芻

六月六日倪舉菴坐雨

山外黃塵不到門
南風松竹翠紛紛
暗中有虎村啤合
夜半聞鷄老睡分
帶得兒來同坐雨
飛歸家去欲排雲
收書忽報今朝喜
病女加餐藥奏勲

九月十日釀飲丹山

舉頭又是菊花天
走遍山林命苟全
忍賦庚寅傷亂世
謾書甲子記流年
陶籬一醉虛拋久
蕭寺重遊夢覺然
今是何時成此會
教人平地說神仙

次韻賦南山廣莫軒

洗眼來看廣莫詩煙霏空翠雨微微
四平地上山起獨拄天南羣望歸
喬木不隨兵焰動好雲時入寺門飛
乾坤浩蕩難言處猛拍闌干閣口機



本堂集卷十五